

liure qui plus, qui moins, vous vn tel (le nommant par son nom) vous y estiez beaucoup escrit, vostre Massinahigan, c'est à dire vostre escriture, est grand, il y a quelque chose qui ne va pas bien dans vostre affaire, vous n'allez pas droit, vous n'avez pas soin de corriger la ieunesse quand elle fait mal. Vn tel qui est baptisé ne croit que du bout des levres, la foy qu'il a s'arreste à la gorge & ne passe pas iusques au cœur, il n'y a point d'apparence qu'il la garde longtemps. Vn tel n'est pas beaucoup escrit dans ce liure; il est homme de bien & sa femme aussi, tous deux vont droit au Ciel. Vn tel qui a quitté sa femme prend le chemin de l'Enfer, & est en danger d'y aller s'il ne s'amende, car son papier est bien long, & il y a bien de l'escriture pour luy. Iamais vous ne vistes des gens plus attentifs ny vn plus profond silence. Cét homme [37] de l'autre monde poursuit; IESVS m'a fait voir, disoit-il, à sa main droite vne chose qui n'a point son pareil en beauté, c'est vne lumiere en comparaison de qui le Soleil n'est que tenebres, vn lieu de plaisirs & de contentemēt, enfin le sejour de Dieu mesme & de tous les Biē-heureux. C'est là où i ay veu les enfans de nos gens, qui sont morts incontinent apres leur baptesme, mais i'y ay veu fort peu d'hommes & de femmes Sauvages baptesmez. A sa main gauche il m'a decouvert vn feu qui m'a fait trembler de peur, dont nous parle fouuent le Pere qui nous enseigne; mais qui est tel qui [sc. qu'il] n'y a point de paroles qui en puisse exprimer la rigueur. C'est dans ce feu que i'ay veu brusler les Sauvages qui ne croyent point en Dieu, & ceux qui croyans en luy ne luy ont point obey en cette vie: i'y ay aussi veu des François, ô que le nombre est